

Date – 14/07/2025

Time - 7:30 Hrs

HEADLINES (MORNING)

1. ASF vawk pulhri leng mekin district 4 baka Khawzawl a luhchilh leh hnu-ah Siaha district leh Khawzawl khawpui chhungah vawk thi a pung chho leh nasa.
2. Tun dinhmunah Mizoramah Covid hri kai mi 4 an awm mek a, kuminah Covid hri kai mi 11 an awm tawh.
3. Sawrkar laipui chuan leitha fertilizer suak suak zawrh leh hralh chungchangah state leh UT te chu khauh taka khuahkhirh turin a hriattir
4. Nizana Wimbledon Tennis tournament mipa final inkhelah World No.1 Jannik Sinner chuan Carlos Alcaraz hnehin a champion.

<><><>

ASF UPDATE

African Swine Fever (ASF) vawk pulhri leng mekin district 4 baka Khawzawl a luhchilh leh hnu-ah Siaha district leh Khawzawl khawpui chhungah vawk thi a pung chho leh nasa.

A bikin kar kal ta Zirtawpni khan vawk pulhri avangin Siaha district-ah vawk 90 a thi a, vawk 90 thi zinga 57 hi Amohtlah khua a vawk thi report tlai a ni a. Khawzawl khawpui-ah hemi ni vek hian vawk 37 thi-in hemi ni hian a vai-in vawk 127 zet a thi a ni. Khawzawl khawpui a veng 6-ah hian Pathianni hmasa, July ni 6 khan vawk 38 a thi a, hemi zinga vawk thi 22-te hi report tlai a ni. Hemi ni atang hian Khawzawl khawpui chu ASF vawk pulhri-in a luhchilh tih hriat chhuah a ni a. Hemi hma hi chuan Siaha, Lawngtlai, Lunglei leh Mamit district-a Zawlnuam khua-ahte chauh vawk pulhri hi hmuh a ni. Nimin khan Khawzawl khawpui-ah vawk 10 thi report a awm a, district dang atangin vawk thi report a awm lova, Khawzawl-ah hian vawk 3 suat a ni a, hei hi ASF vawk pulhri-in a luhchilh hnu a vawk suatna hmasak ber a ni.

Nimin thleng khan kumin March ni 20-a Guwahati laboratory-a Mizoramah ASF vawk pulhri a leng tih hmuhchhuah atangin kuminah vawk 5,576 a thi tawh a, khua leh veng 87 chu ASF lenna a puan a ni tawh a. Vawk pulhri darh zel venna atan vawk 1,834 suat a ni tawh bawk.

<><><>

HIVDS

Health Minister Pi Lalrinpui chuan Inrinnei khan Mizoram State Positive Network (MSPN) chu Aijal Club-ah a tlangzarh a, Mizoram State AIDS Control Society (MSACS) Project Director Dr. Jane R. Ralte chu khualzahawm a ni.

Pi Lalrinpuii chuan Mizorama HIV veite inzawmkhawmna leh intihchaktawmna tur pawl din a ni chu lawmawm a tih thu sawi a. HIV veite tan mahni dinhmun inpawm leh nunpui thiam a pawimawh thu leh, hmalam hun thlir thiam tura fuihtu an mamawh thu sawiin, hemi atan hian anmahni dinhmuna ding ve leh an tawn ang lo paltlang ve tawhte chu an tangkai hle thu a sawi a ni. Minister chuan HIV hrik paite'n Antiretroviral therapy (ART) tha taka an lak chu sawrkar pawhin a ngaih pawimawh thu sawiin, a thlawna ART lak theihna Centre 14 chu ZMC&H, Kulikawn Hospital, Synod Hospital leh District Hospital tinah te buatsaih a nih thu a tarlang. HIV kaihnhawih natna dang laka an him theih na'n leh midang an kaichhawn loh na'n ART tha taka lak a pawimawh thu a sawi bawk.

Mizorama ruihhlo rawn lut nasa chuan thil tha lo tam tak a kentel thu leh HIV pawh a tih darh nasat phah thu tarlangin, ruihhlo rawn lut tur dan a pawimawh zia leh ruihhlo ti lo tura inzirtirna zau zawk kalpui a pawimawh thu a sawi bawk a. Sawrkar chuan HIV darh zel tur ven leh inzirtir lamah nasa takin hma a la tih sawiin, hemi kawngah hian MSPN pawh chak zawka tan la turin a sawm a ni.

Dr. Jane R. Ralte chuan Mizorama mihring awm zat atanga chhutin (prevalance) HIV vei mi za zel 2 point 73 an awm mek tih sawiin, India ram puma a sang ber a nih

thu leh HIV vei thar (incidence) erawh kum 2018 atangin an tlem tual tual thu a tarlang a. HIV hrik kai a inrinhlelna nei an awm chuan inendiktir vat a pawimawh thu leh an hri an kai a nih chuan ART tha taka lak a pawimawh thu a sawi bawk.

<><><>

COVID SITUATION

Tun dinhmunah Mizoramah Covid hri kai mi 4 an awm mek a, kuminah Covid hri kai mi 11 an awm tawh a, mi 7-te chu enkawl dam an ni tawh.

Health & family welfare hnuai a integrated disease surveillance programme (IDSP) thuneitute sawi danin Ningani khan Covid hri kai ni a rinhlelna mi 7 an endik zinga 1 chuan hri a kai tih hmuhchhuah a ni a, Zirtawpni khan mi 5 an endik zinga 2 chuan an kai tih hmuhchhuah leh niin Inrinni khan 1-in a kai tih an hmuhchuak leh a. Covid hri kaite hi Aizawl district ami vek an ni a. Hri kai tih lang chhuak nasa an awm lova, damlo na tak leh enkawl zui ngai lutuk an awm bawk lo niin an sawi. Mizoramah hian kumina Covid hmuhchhuah leh hmasak ber chu May thla laihawla mi 2 hri an kai tih hmuhchhuah kha an ni a. Anni dawtah hian June thla chho khan hmuhchhuah leh an awm bawk. Niminah khan Covid inrinhlelna avanga thisen endik an awm lo niin IDSP hotute chuan an sawi.

Covid hri len vanglai, kum 2020 March thla chawhnu lam atanga intan kha nikumah kha chuan a zia-awm hle tawh a. Mizoramah chuan nikum chhung khan Covid hri kai mi 74 an awm a, nunna chan an awm lova, October thla atanga kumin May thla laihawl thleng khan hri kai hmuhchhuah an awm lo. Covid hri leng avang khan Mizoramah mi 734-in an thih phah a, kum 2021 kha thihpui tam ber kum niin mi 538 an thi a ni.

Mizoramah vawiin thleng hian Covid hri kai leh kai lo sample nuai 19, sing 9, sang 7 leh 739 endik a ni tawh a, an zinga mi nuai 2, sing 3, sang 9 leh 646-te chuan hri an kai tih hmuhchhuah a ni a, mi 734-in thihpui-in mi nuai 2, sing 3, sang 8 leh 908 te chu an dam chhuak leh a ni.

<><><>

CHIN CONFLICT

Chin state khaw thlang lama July ni 5 atanga Chin ralthuam keng pawl pahnih an inkah avanga Zokhawthar a Myanmar mi raltlante chu a tam zawk an kir chho leh tawh.

Zokhawthar VCP Pu Laldinthara'n Akashvani Aizawl a hrilh danin Inrinni khan raltlan 2,400 vel chu Myanmar a Chin state-ah an kir leh tawh a. Nimin lamah pawh a hlawp ni lovin kir chho chu an awm reng niin a sawi bakah Zokhawthar a la chambang chu awm bawk mah se an tlem tawh hle niin a sawi a ni. Police chhinchhiah dan chuan nimin chawhma dar 9 vel atanga tlai dar 5 leh a chanve thleng khan raltlan 2,319-te'n Tiau lui kanin Myanmar an lut a, raltlan kir lehte hi hmeichhia 1,132 leh mipa 1,197 an ni a. An lo luh lama an lo chhinchhiah ang bawkin kir lehte hi Zokhawthar Police leh Assam Rifles-te'n an lo chhinchhiah zel a ni. Niminah khan chawhnu dar 12 leh a chanve thlengin mi 70 an kir chho leh tawh bawk. Police chhinchhiah dan chuan July ni 5 atanga kar kalta Ningani thleng khan raltlan 3,892 lo lut an awm a, naupang chhinchhiah hmai an awm theih thu an sawi thung.

Chin National Defence Force (CNDF) te'n Chinland Defence Force (CDF)-Hualngoram inkulhna kap a, an inkulhna hmun 8 an laksak vek avanga raltlan an ni hlawm a. Hriat theih chinah CDF-Hualngoram mi 2 chu inkahna-ah hian an thi a, mi 5-in hlaim an tuar a, CNDF mi 2 an hlaim bawk a. Hliam zawng zawng hi Mizoram lama hruai an ni. Zokhawthar a raltlan rawn lutte hi Khawmawi leh Rihkhawdar khua an ni ber a, a bul hnai khua - Satawm, Lianhna leh Tuichirh atanga rawn lut an awm ve bawk ni a hriat a ni.

Zokhawthar VCP-in Inrinni lama a sawi dan chuan CNDF hovin Ningani zana an khaw awpte an chhuahsan hnu khan Khawmawi a awm Hualngoram People's Organisation (HPO) hruaitute'n an khua a kir leh duh an awm leh awm loh lo hriatsak tura an ngen angin an puang a. Kir leh duhte chu Inrinni atang khan an kir leh tan ta a ni.

Hetih lai hian Champhai district chhimlam East Tuipui assembly bial chhung khua Saikhumphai, Vaphai leh Farkawn a Myanmar raltlan 850 vel erawh chu an ramah an la kir thei rih lo. Vaphai khaw per Saikhumphai a YMA hruaitute hnen atanga thu

dawn danin Tiaukam leh lama inkulh Chin National Army (CNA) mite’n raltlante hi kir chhoh an la remti lova, an thlawhhma a an tulzia sawi a nimina chhoh dilte pawh chinfel tur an la neih chhuanlamin kir an la phal lo niin an sawi.

<><><>

BIOMETRIC ENROLMENT

Mizorama Myanmar raltlan awm mekte kutzia leh mit naute thla la a chhinchhiah hna chu tan theih thuai tum a ni. Home department hotute'n an sawi danin Myanmar raltlante biometric enrolment hmanga chhinchhiah tur atan hian ruahmanna peih thawkhat tawh a ni chungin a bul tanna tur a nih avangin hmanraw lamkhawm leh ngai neuh neuh a awm avangin an la tan thut mai thei lo a. July thla chhung ngei a hna tan hman an tum a, a ni tak erawh chu an la sawi fak thei lo thung. Biometric enrolment tur hian district tina bawrhsap kaihhruai District Level Committee on Displaced Persons chu mawhphurtu a ni dawn a. He committee hnuaiah hian a taka hna kalpuitu tur Biometric Enrollment of Displaced Persons ti a vuahin nodal officer ruat zel a ni a. Nodal officer kaihhruaina hnuaiah hian bawrhsap pisa leh district SP pisa a thawk thlan bikte bakah raltlan awmna khaw tina VC leh YMA hrulaitute chu mawhphur tura ruat an ni.

YMA leh VC te hnena biometric enrollment pawimawh zia hrilh thar lehna hun hman a nih bakah raltlante pawh an rama tihluihna a thawnletna tur a nih lohzia inhrihlhriat nawn leh a ni ang a. Khawl hman tur te a thlen kim hun veleh raltlan awmna khaw tina enrollment lak hun tur ruahmanna siam a ni ang. Raltlante kohkhawma chhinchhiahna tur hmunhma chu an khaw hrulaitu VC leh YMA te'n tha an tih angin an ruahman ang a. Hemi peihfel hunah hian biometric enrolment hi kalpui tan a ni dawn a ni. Tun hnai a Zokhawthar bakah Vaphai, Saikhumphai leh Farkawn lama raltlan lo lut belhte tiam lovin tunah hian Myanmar raltlan hi mi 32,000 chuang hret an awm ni a chhinchhiah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

FERTILIZER

Sawrkar laipui chuan leitha fertilizer suak suak zawrh leh hralh chungchangah state leh UT te chu khauh taka khuahkhirh turin a hriattir. Union Agriculture and Farmers Welfare Minister Shivraj Singh Chouhan chuan State leh UT Chief Minister te hnenah lehkha thawnin he thu hi a tarlang a. Fertilizer suakte, dankalha fertilizer tawlhruk leh ramchhung hmun hrang hranga hemi kaihhnawih dan kalha chetna te khap tlat anih thu tarlan a ni bawk. Pu Chouhana chuan agriculture chu India eibar zawннаah a bulthut anih thu sawiin loneitute sum lakluhna hnar ber a ni a ti a. Hei vang hian a hun takah man tlawm zawka lei tha an dawn a pawimawh a ni tih a sawi bawk a ni.

<><><>

RAJYA SABHA MP

President Droupadi Murmu chuan Rajya Sabha member atan mi hmingtha tak tak pali a ruat thar. Heng MP atana ruat tharte hi ukil hriathlawh Ujjwal Deorao Nikam te, Social Worker C Sadanandan Master te, sawrkar laipuia Foreign Secretary hlui Harsh Vardhan Shringla leh Historian leh academician Dr. Meenakshi Jain te an ni a.

<><><>

TENNIS

Nizana Wimbledon Tennis tournament mipa final inkhelah World No.1 Jannik Sinner chuan Carlos Alcaraz hnehin a champion. Sinner hian 4-6,6-4,6-4,6-4 in Alcaraz hi a hneh a ni. Jannik Sinner hi Italian Tennis Player zingah Wimbledon champion hmasa ber a ni a. Grnad Slma tournament-a a championi vawi li na a ni.

<><><>